



UKA 2018/82

18/10-2018

Justus Hansen

Maannakkut ineqarnermut tapit pillugit malittarisassani isertitat tunngaviusarneri pinngitsoorani ilumut inunnut aningaasatigut pisariaqartitsinerpaaginnarnut atuunnersut pillugit allaaserinninnertalimmik misissuinertalimillu UKA2019-mi nassuiaammik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Aamma ilanngunneqassaaq init ataasiakkaat ingerlanneqarnerannut aningaasartuutit piviusut aaqquissuussinerup qularnaartarnerai. Nassuiaammi aamma ilanngunneqassapput tigussaasut siunnersuutit innersuussinerillu Akileraartarnermut Atugarissaarnermullu Ataatsimiititaliap allaaserisai ineqarnermut tapiisarnermut tunngatillugu ataqatigiissaariniarnikkut ajornartorsiutaasartut ataatsimoortumik aaqqiiviginiarlugit.

(Inatsisartuni ilaasortaq, Tillie Martinussen, Suleqatigiissitsisut)

Siullermeerneqarnera

Siunnersuutip allanneratut Inatsisartut 2017-mi ukiakkut naleqqussaanerit arlallit akueraat - aamma Demokraatit isaanni pitsanngorsaataasussat - immikkoortumi ineqarnermut tapinut tunngasumi. Allatut oqaatigalugu qanittunnguakkut immikkoortumi allanngortitsivugut.

Demokraatinut pingaaruteqarpoq tamatigut isumagisassallugu inunnik isumaginninnermi ikiorsiissutit soorlu ineqarnermut tapit ima angissusilerneqarsimassasut sulineq imminut akilersinnaassalluni pisortanit pilersorneqarnermut naleqqiullugu.

2017-mi allannguinerit eqqortup tungaanut alloriartitsippot.

Kingullermik allannguinermiik ukioq ataaseq suli qaangiutinngitsorluunniit Suleqatigiissitsisunit maannakkut ineqarnermut tapit pillugit malittarisassani isertitat tunngaviusarneri pinngitsoorani ilumut inunnut aningaasatigut pisariaqartitsinerpaaginnarnut atuunnersut pillugit



allaaserinninnertalimmik misissuinertalimmillu nassuiaasiortoqarnissaa aningaasartorfiussasoq kissaateqartoqarpoq.

Demokraatini takujuminaatsipparput suna pitsaaqutaassanersoq taamatut nassuiaasiortitsinerup aningaasartorfiunissaa. Oqareernitsitut uatsinnut pingaaruteqarpoq pisortanit pilersorneqarnermut naleqqiullugu sulinerup imminut akilersinnaajuarnissaata nakkutigiuarnissaa.

Taamatut oqaaseqarluta inassutigaarput siunnersuutip itigartinneqarnissaa.